



KLOAREK KOAT AR RANNOU

HA

PENN-HEREZ KERZANTON.

Wardon : *Kurunen aour ha perlez ann Itron Varia Remengol*

Karantez ha glae'har !!!

I

Tud yaouank a Vreiz-Izel, didostait da glevet
Ar recit eus va dañlou ha va foñnioù kalet :
Me so eur c'hloarek iaouank a eskopti Kemper
Am boa choazet eur vestrez enn eskopti Treguer.

E c'harz ar mor oun ganet e bro sant Gwenole,
Ha biskoas nemet glae'har n'em euz bet em bue :
Glae'har ha guir garantez, setu va flaneden,
Planeden rust ha kalet da heulia pen-da-ben.

Pa oan em bugaleach va mam baour aliez
A lavare din : « Va mab, kar ha ped ar Werc'hez,
» Ped anez-hi, va mabik, ped Gwerc'hez Remengol,
» Mar he fedez a galon, biken ne di da goll. »

Patronez va mam dener, Gwerc'hez vad Remengol,
Pet gweach oc'h euz-hu miret na dounn me eat da goll !...
Ho pedet am euz bepret... breman arok mervel,
E kaninn ho meulendi d'am breudeur Breiz-Izel.

II

Pa gimiadiz dioc'h va zud, pa ziz pel eus ar ger,
Evit mont war ar studi e skolach Landreguer,
N'em boa nemet pemzek vloa, me a wele dourek,
Rag evidon ne voa ken, allaz, a eurustet.

O tostaat oc'h Landreguer e kaviz eur plac'hik ,
Koant vel eun zelik Doue , he hano oa Metik ,
D'ar gouent e zea ive , evel d'on d'ar studi ,
He c'halonik oa mantret kement ha va hini.

« Salud deoc'h , plac'hik iouank , a lavariz dez-hi ,
» Evel d'oun oc'h ankeniet o kuitat tud ho ti ;
» Ho tornik flour em dornik lakit gant karantez ,
» Hag e vezimp eurusoc'h o wela assamblez. »

Ar plac'hik a lavaraz : « O kloarek Gwenole ,
» Pedomp Doue aliez ann eil 'vit eguile ;
» Er joa koulz hag en anken d'alc'hit sonj a Vetik ,
» Euz a vremen da viquen e vo ho mestrezik. »

« O Metik , va c'harante , rozen gaer Breiz-Izel !
» War ho mignon Gwenole tolit breman eur zell ,
» Eur zell digant ho lagad a rañ va eurstet
« Keit a ma lezo Doue achanon war ar bed. »

Erru e kear Landreguer , erru e penn hon hent ,
Me oe kaset d'ar skolach , ha Metik d'ar gouent ;
Ann disparti oe kaset , c'huer o hag ankeniuz ;
Ann eurstet , er bed man siouas ! n'eo ket padus !...

Tre ma chomiz er skolach , skeuden dous Metik kez
Enn deiz , en noz dirazon a deue aliez ,
Neuze e peden Doue ha Sant koz Breiz Izel
'Vit ma vije he bue laouen , eurus , santel.

III.

Pa oe ahu va studi ez iz da Remengo !
Da bedi c'hoaz exit-hi Gwerc'hez vad *Remed-oll* ;
Seiz tro a riz d'an aoter , devez ar pardon braz
Ha seiz tro d'ann Iliz sakr war benn va daoulin noaz.

Goude ann oferen bred , o pebeuz levencz !...
Er vered gaut he mamm ger , e velis Metik kez :
Laouen oa evel ann deiz ha koant evel al loar ,
Biskoaz pen-herrez ker koant n'euz bet war ann douar.

Luguerni a re he zall , he diou chod gwen ha ru ,
He ginou , vel eur rosen , he bleo , he lagad du ,

Eur groaz aour en he c'here'hen , he c'hoef dantelezet ,
Lavaret ' vije eun æl euz ann ên diskennet.

« O ! pebeus joa evidomp , va c'hloarek Gwenole ,
« En em gaout e Remengol , deiz pardon Mamm Doue ,
« Man,m ann oll dud ankeniet , Gwenole , ma mignon ,
« Evidout , e peb amzer , he fediz a galon.

« Metik koant , setu aman , setu ar voalen aour
« A roaz d'in , arog mervel , Annaik , va mamm baour ,
« Doug anez hi war da viz , kemer-hi digan-en ,
« Me dou war goalen va mamm d'az karet da viken.

« Ar groaz aour zo em c'here'hen a vo did , Gwenole ,
« Eur guchen euz va bleo du a roan did ive ;
« War ar groaz se e touan ha dirag ar Werc'hez
« E vi karet gant Metik ' tre ma vo e buez. »

Ha daoulinet en Iliz , hon euz gred hor peden ,
Ha roet evit offrans , eur c'houriz koar melen ,
Binniget hor medalen , poket d'ar relegou ,
Da relegou sænt Breiz , karet gant hon tadou.

Goude hon eus baleet hon daou dre Vreiz-Izel ,
Ha guelet kals 'ilizou , kals a douriou huel ,
Abbati Landevennek ha mor Douarnenez ,
Lee'h ma oe beuzet kear Is hag ar brinces Ahez.

Gwelet hon deus Mene-Hom , hag ilis veur Kemper ,
Mene-Bre , ilis Bulat hag hini Landreguer ,
Kastel Brest , Sant Ian-ar-bis , ilis Salaün ar foll ,
Ha kaëra tour so er bed , tour huel Kastel-Pol.

Gwelet hon euz Ker-Ahez , Kemperle , Pont-n'Abat ,
Fouenan , bro ar merc'hed koant , Gwengamp hag Huelgoad
Montroulez ha Lann-Huon , Krozon ha Lez-n-even ,
Kallak , bro ar gouriaou , Kastel-liu , Rosporden.

Klevet on euz o krozal ar mor e beg ar Raz ,
Biskoaz den n'hen tremenas eb santout aon pe c'hlaz ,
Bet omp en enez Sizun , en Heussa , Molenez ,
En enez Vaz , er leodet , ive er seiz enez.

Eur bloavez omp bet eurus evel daou æl Doue ,
E pep lec'h , pa hor guelec'h , ann holl a lavare :
« Setu kloarek ar Rannou , soun evel eun derven ,
» Setu Metik , he vestrez , fresk evel eur rozen . »

IV

Devez pardon sant Herbot , e kleviz eur c'helou
En euz beuzet va c'halon , en eur mor a zaëlou ,
Gant he zad ha gant he mamm d'am mestrezik Metik.
Ez oa choazet da bried eur pagan pinvidik.

Ar pagan ze oa diot , hep furnez hep skiant ,
Ne gare war ann douar nemet ar gwîn-ardant ,
Metik paour pa er gwele a grene gant enkreuz ,
Hogen , he zud oa dallet , allas ! gant ann danvez !...

Mont a riz primm d'he gwelet neuze da Gerzanton ,
Dre ma tostaen em c'hreiz , e krene va c'halon ,
War dachen ar bourg o son e oa ar biniou ,
Tud ann eured ha Metik beuzet en he daëlou.

Metik , a dreuz he daëlou , a reaz ouz-in eur sel
En eur lavaret : « *Kouraj , Kouraj , mignon fidel !*
Monet a ra en itis , lavart'ra d'ar belek :
« *Guenole èo a garan , hag en vo va fried !...*

Koueza reaz d'ann douar , raktal ar benn-herrez ,
Ha douget e oe dioc'h-tu euz ann ilis er mez ;
Dispak he c'hoef , he dillat , ha dispak he bleo ;
Seblantout a re beza eun ælik paour maro.

Mantret oil gant ar glac'har e koueziz dann daoulin ,
En eur grial : « O Metik , sell a druez ouzin !... »
Pokat a riz d'he dornik , d'he diou ehod , d'he c'herc'hen ;
O Metik ! Metik ! Metik ! Te p'hini a garien !...

Ann disesper en dro din , evel eur vantel blom ,
A gassaz pell a c'hanon , pell war zu Mene Hom...
Va skiant a so kollet , va c'halon a so ien ..
O Metik ! Metik ! Metik ! Te p'hini a garien !...

Eiz de goude , asezet e kreiz koat ar Rannou ,
War va diou ehod e rede diou feunteun a zaëlou...

Pa glevis e Remengol o son ann anter-noz
E lavaris esklamet : « Va Doue , deoc'h bennos !

• O Gwerc'hez sakr Remengol , sellit oc'h va glac'har ,
• Aman oun deut da vervel brema war ho touar ,
• Vare'hoaz pa zavo ann heol arc'hantet en envo
• Dindan an derven goz ma , me vo kavet maro !!!...

• O Metik , va dousik koant , te p'hini a garien ,
• Kenavo 'lavaran did er bed ma da viken !
• Gant ar maro unanet , ni c'hoaz en eum garo ,
• Kenavo er baradoz , kenavo , kenavo !!!...

V

Ann de varlerc'h , da zao heol , eun durzunel hep par
A hirvoude en derven he c'hlemou a c'hlae'har ;
Ar c'hloarek a ioa maro , maro gant ann anken ,
En eur lavaret : « *Metik te p'hini a garien !*

Ar c'hloarek paour a starde , c'hoaz war he vuzellou ,
Kroas aour ha bleo du Metik , glebiet gant he zaëlou ;
War ann derven'n'doa skivet hano he garante ,
Ha diou galon unanet treuzet gant eur c'hleze.

Kasset eo bet ar c'hloarek da vered Remengol ,
Ha sebeliet e disheol ilis sakr Remed-oll ,
Iliz Patronez he vamm en deuz bet ken karet !...
Tud iaouank a Vreiz-Izel , pedit 'vit-han bepret.

Setu eta Gwenole en he vele douar !!!...
Eur miz goude oe klevet huanadou glac'har...
Eur plac'hik gwisket e du , e bered Remengol
Deut di da bedi Doue ha Gwerc'hez Remed-holl.

O tremen dre ar vered , velaz war eur men he
Skrivet neve flam hano he mignon Gwenole.
Epad ann noz daoulinet , Metik wele dourek ,
Ha d'ar men be e poken , e poken kalonek.

• O Gwenole , eme-z-i , setu te o repoz
• E douar sakr Remengol ez out deut d'am gortoz ,

- » Mes kent ma tarzo ann de , o va muia karet ,
- » Er be man , dre zorn Doue , ni vezo unanet !!!...

Da zao-heol eur belek koz , 'vont da bedi Doue
He c'havaz anter-varo , gourveet war ar men-be ,
Rei a raz d'ar plac'hik paour absolven ha pardon ,
Metik a varvaz laouen , raktal , gant rann-galon !...

Enn eur vogeden ezanz ene glân Metik kez ,
'Vel eur goulmik , a nijaz d'ann ên gant ann elez ;
Euz a varados Doue eur goabren arc'hantet ,
War tour Iliz Remengol , neuze , zo diskennet.

War ar goabren ar Werc'hez ha saent koz Breiz-Izel ,
'Deuz kurunet Gwenole hag he vestrez santel ,
Barzet ann amzer zo bet , drant , war ho zeleannou
Da Zoue , e brezonnek , a gane ho gwersiou.

Sebeliet e korf Metik , kichen korf Gwenole ,
Ar maro 'n deuz unanet ann eil gant egile...
Eur c'hloarek karantezuz 'n deuz war ho be skrivet
Ar c'homzou truezuz man , gant he zaëlou mesket :

- » *Aman e repos , e peoc'h , kloarek koat ar Rannou*
- » *Den a seiz hag a-galon , den a garie he vro ;*
- » *En e gichen eo kousket penn-heres Kersanton ,*
- » *Metik , ann ælik Doue , maro gant rann-galon !!!... »*

O gwerc'hez vad Remengol , setu ho taou vuguel
Kousket e tal hoc'h Iliz ha dindan hoc'h askel ,
'Vel eur Vamm garantezus war gavel he mabik ,
C'hui dolo evez war be Gwenole ha Metik !!!...

Kleier , ograou Remengol , truezuz c'hui zono ,
Barzet ha pelerinet , daëlou c'hui a skuillo ,
War be Metik , Gwenole , pa rafet ho peden ,
Eur beden a garante ha karget a anken !....

Bevit e doujanz Doue , tud iaouank Breiz-Izel ,
Pedit gwerc'hez Remengol evit ma viot santel ;
Sonjit ive e Metik , sonjit e Gwenole ,
Bezit evel d'ho fidel ann eil d'eguil.

Koad ar Rannou, (Rann, Rannou, chants, séries), *bois des chants ou des séries*. Koad bras e dero, a zo e kichen, ha dar zao heol da ilis Remengol. Ann Drouizet, belcien ar Vretonnet, gwechal c'hoas difeiz, a droc'he, bep bloaz, gant eur gontel aour, e koat ar Rannou, eul louzaouen, hanvet *huel-var*, p'hini a zao war ann dero.

Barz, barzet, (barde, poëte). Bep bloaz ive enem gawe e koat ar Rannou hag e *Rumengoulou*, hirio hanvet Remengol, Barzet ann Arvor. Ar re ma a oa tud a skiant pere a gane gwersiou great gant ho, war ann traou kaer erruet er vro, kana a rent ive meuleudi Teutatès. Doue faoz, p'hini a oa enoret el leac'h e ma brema iliz Remengol. D'ann hini vije hanvet Barz e roet eur gurunen dero hag eun dclen aour, war p'hini ar Barz a gane he soniou.

Gwenklan, Marzin, Taliézin, a oa barzet e Breiz-Izel kent m'a teoaz en-hi ar feiz kristen. — Brema zo c'hoaz e Breiz kalz Barzet, pere laka ho studi hag ho foan evit kenderc'hel en hon touez ar feiz ha iez hor bro. Er pen kenta eus ar barzet e ma ann aotronez Kermarker, barz Breiz; ann abad Herri, barz ann Avel; Troude; Kemar, person ha barz sant Laurans; ar Iann, barz koat ann Noz, Millin, barz Laouenan Breiz; Rannou, barz Roc'h Allaz; ar Skour, barz Itron Varia Remengol; F.-M. an Huel, barz Ker-ar-Born; Olier Souveïr; barz Plouïan; ann abad Poullaouek, kure Landevennek, barz sant Gwenole; Karis, person Plougras, barz Mene-Bre; Guernisson, barz Keravel, ha kalz a re all, pere o deuz gret eun niver bras a werziou ha soniou kaer.

- Kanit anez ho, Breiziz, rag beza int gwerziou
- Gret gant skiant ha kalon ha gant gwel vad komsou.
- Gret int e brezonnek mad, nan e koz srezounek,
- Evel ar re zo kalz re e brezonnek-gallek. »

Barzet ha pelerinet, kanit gwerziou santel,
Kanit gloar ha meuleudi da vamm tud Breiz-Izel,
Ho Mamm hag ho Patrones. Rouanes ar bed oll,
Mamm ann dud paour, ankeniet, *Gwerc'hez vad Remengol*.

I.-P.-M. AR SKOUR,

Barz I.-V. Remengol.

PROPRIÉTÉ.

ANN HINI A GARAN

War eun ton neve.

Ann hini a garan 'zo koant evel ann heol.
Karantezuz evel Gwere'hez vad Remengol.

 Doue sent Breiz-Izel, Doue va zadou koz,
 D'ann hini a garan roit bepret ho pennoz.

Ann hini a garan 'zo dous evel al loar,
En noz pa sklerijen bugale an douar.

 Doue sent Breiz-Izel, etc.

Ann hini a garan 'zo vel ann alc'houeder
D'am e'halon paour e kan soniou, gwersiou tener,

 Doue sent Breiz-Izel, etc.

Ann hini a garan 'zo 'vel ann darzunel,
Pa ve maro he far, enem doll da vervel.

 Doue sent Breiz-Izel, etc.

Ann hini a garan 'zo eun ælik Doue,
Eun ælik dous a ra joaustet va bue.

 Doue sent Breiz-Izel, etc.

Ann hini a garan a zo dous he hano,
Evel ar mel eo mad, koant evel ar bleunio.

 Doue sent Breiz-Izel, etc.

Ann hini a garan em e'halon a chomo,
'Tre ma vin e bue, ha goude va maro.

 Doue sent Breiz-Izel, etc.

Ann hini a garan gane-me en disheol,
A reposo eun de e bered Remengol.

 Doue sent Breiz-Izel, etc.

Ann hini a garan e palès ann Drindet,
Gane-me da viken a vo karet, karet.

 Doue sent Breiz-Izel, Doue va zadou koz,
 D'ann hini a garan roit bepret ho pennoz.

I.-P.-M. AR SKOUR, *Barz I.-V. Remengol.*